



ALTERNATIV DEMOKRATESCH  
REFORMPARTEI

Groupe parlementaire

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 2, Oktober 2019

Här President,


Sou wéi d'Chambersreglement et virgesäit, bieden ech lech, dës parlamentaresch Fro un den Här Schoulminister weiderzeleeden.

De System vun de sougenannte „gratis“ Schoulbicher, deen de MEN agefouert huet, verleeft net ouni Schwieregkeeten. De System schéngt an der Praxis relativ komplizéiert a mat vill Opwand verbonnen ze sinn. An deem Zesammenhank wollt ech dem Här Minister dës Froe stellen:

1. Wéi e Bilan zitt den Unterrichtsministère aus den Erfarunge mat dem neie System vun de Schoulbicher? Wou gesäit de Ministère eventuell Problemer?
2. Gëtt et just d'Méiglechkeet, déi Bicher iwwer Internet unzefroen, oder kréien d'Elteren an d'Schüler (eventuell op Ufro) och en Dokument op Pabeier?
3. Den definitive Programm fir d'Librairie kënnt, no der Meenung vu Villen, vill ze spéit eraus (dëst Joer wor dat de 19. Juli 2019). Da gëtt et nach eng Rei vu Kontrollen an administrative Schrëtt an eréischt dono kënne Bestellungen vun de Libraire gemaach ginn. Fir verschidde Bicher (z.B. fir d'Fach Englesch) ass dat ze spéit, well hei d'Liwverfrist besonnesch laang ass. Gesäit den Här Minister hei d'Méiglechkeet fir Verbesserungen?
4. Och verschidden Eltere beschwéiere sech iwwer ze vill kuerz Delaien, besonnesch wa si digital net esou fit sinn. Ass den Här Minister der Meenung, datt et sënnvoll wär, och am Interessi vun den Elteren a vun de Schüler, d'Delaien ze verlängeren?
5. Wat geschitt, wa Professere Bicher vun der Lëscht schlussendlech awer net benotze wëllen an de Schüler dat am September matdeelen? Menges Wëssens huelen d'Librairien déi Bicher net erëm. Kéinten déi, am Fall wou d'Leit se net fir een eventuelle perséinleche Gebrauch hale wëllen, gesammelt ginn, z.B. fir an eng öffentlech Bibliothéik, eng Schoulbibliothéik oder fir d'Besoinen am nächste Schouljoer stockéiert ginn?
6. Am Fall, wou Professeren nach aner Bicher, wéi déi, déi op der Lëscht virgesi sin, benotze wëllen, oder an der Mëtt vum Joer e weidert Buch benotze wëllen, ginn déi Bicher dann och rembourséiert? Wa jo, no wéi enge Modalitéiten?
7. Wéi eng Autonomie hunn d'Lycéeën an déi eenzel Professere fir de Choix vun de Bicher, déi kënne rembourséiert ginn?

8. Kéint de Ministère sech virstellen, de System sou ze flexibiliséieren, datt Profresseren, déi dat wëllen, selwer déi Bicher, déi si benotze wëllen, kollektiv an de Librairie bestelle kënnen an d'Bicher fir hir Klassen dann an d'Lycéeë liwwere loossen?
9. Wann d'Librairen oder d'Schüler op den Helpdesk uruffen, gëtt den Uruff dacks net entgéint geholl oder si hänke ganz laang an enger Schleef, ouni datt eppes geschitt. Och wann den Uruff beäntwert gëtt, gëtt de Leit dacks just geroden eng E-Mail ze schreiwen, wourop een dann en „accusé de réception“ kritt an dann eréischt no 4 bis 5 Deeg eng richtig Äntwert. Besonnesch fir Librairen ass dat e ganz schwierigen Ëmstand. Gesäit den Här Minister eng Méiglechkeet, fir de Service vum Helpdesk ze verbessern?
10. Wär et méiglech, datt eng besser Koordinatioun tëschent deenen zoustännegen Instanzen an dem Sënn virgesi gëtt, fir datt déi gefrote Bicher och effektiv zum gewënschten Zäitpunkt disponibel sinn?  
Dacks schéngt et leider esou ze sinn, datt sech weder de Ministère nach d'Programmkommissiounen am viraus intensiv genuch doriwwer informéieren, ob déi Bicher, déi si op de Programm setzen, och disponibel sinn. Dëst bréngt mat sech, datt dacks Bicher um Programm stinn, déi vergrafft sinn oder nei gedréckt (réimpression) ginn. An esou Fäll kënn et vir, datt esou Bicher eréischt vun Enn September oder esouguer Enn Oktober un disponibel sinn.  
E puer Beispiller vun dësem Joer: *Leporello* (vum Ministère erausginn) - parution octobre; *Histoire - Lumière et Révolution édition spéciale pour le Luxembourg* (Nathan) - parution octobre ; *Français littérature, anthologie chronologique* (Nathan) - parution octobre
11. Bei eenzelen Titele kënn et fir, datt de Ministère ouni Virwarnung Bicher vum Programm hält oder duerch eng aner Editioun oder en anert Buch ersetzt. Zu dem Zäitpunkt hunn d'Librairen oder d'Schüler awer dacks schonn déi Bicher bestallt, déi um Ufank virgesi waren. Wann d'Schüler dann an de Bicherbuttek komme fir hir Bicher matzehuelen, sti si net méi op hirer Lescht, wat mat sech bréngt, datt d'Libraire hinnen se net kënnen matginn. Déi ursprénglech bestallte Bicher kréien d'Libraire dann net méi verkaf a maachen dorop eng Perte. Wat kann den Här Minister maachen, fir de System méi zouverlässeg ze maachen?
12. D'Schüler schéngen dacks net richtig doriwwer informéiert ze sinn, datt si fir verschidde Fächer (z.B.an der Mathematik) müssen d'Sprooch (Franséisch oder Däitsch) an/oder den Niveau („base“ oder „avancé“) op hirer „MyBooks App“ eraus wielen. Wa si dat awer net maachen, komme keng Bicher op hir Lescht stoen. Wat kann de Ministère maache fir d'Schüler am viraus besser doriwwer ze informéieren?
13. Bei den Decompten, déi de Ministère all Dag eraus schéckt fir d'Librairen ze rembourséieren, kënn et menges Wëssens zu Onkloerheeten. Verschidden Titele gi mat null Euro verrechent, obwuel d'Libraire jo déi Bicher hire Fournisseure muss bezuelen. Ass den Här Minister bereet, fir de Fonctionnement vun den Decompten am Dialog mat de Librairen ze iwwerpräiwen a, wann néideg, ze verbessern?

Mat déiwem Respekt,



Fernand Kartheiser  
Deputéierten